




J b
4063 K



10
Rom







Ein iermon auff das
 Euangelium Mat
 thei am ix. Ca.
 Vom reych Christi/
 welches stehet ynn verge
 bung der sunden.
 Von probierung der geyster.
 Vom vermögen des frembs
 den glawbens.
 Von zweyerle gewalt vff er
 den sunde zuvergeben.

1. Mica 19 Trinitat.

Mart. Luther

Wittemberg.

M D XXV.



Faint, illegible text, likely bleed-through from the reverse side of the page.

Universitäts-
Bibliothek
Halle

22, 3375



Das Euangelium am xix Sontag
Matthei am ix. Capitel.



Da der herr trat ynn das schiff/
und fur wider herober/und
kam yn seyne stadt/vñ sihe/da brach
ten sie zu yhm einen gichtpruchtigen/
der lag auffem bett. Da nu Ihesus
yhren glawben sahe/sprach er zu dem
gichtpruchtigen/sey getrost/meyn sohn/deyn sund
sind dyr vergeben. Vnd sihe/ettlich vnter den schrift
gelerten/sprachen bey sich selbs/dieser lesteret Gott.
Da aber Ihesus yhre gedancken sahe/sprach er/was
rumb denckt yhr so arges ynn ewren hertzen? wilchs
ist leychter? zu sagen/dyr sind deyne sund vergeben?
odder zu sagen/stand auff vnd wandele? Auff das
yhr aber wisset/das des menschen son macht habe/
auff erden/die sund zu vergeben/sprach er zu dem gi
chtpruchtigen/stand auff/heb auff deyn bette/vnd
gang heym/vnd er stund auff vnd gieng heym/
Da das volck das sahe/verwundert es sich
vnd preyszete Got/der solche macht
den menschen geben hat.

¶ yn

Eyn sermion auff das Euangeliū

Mathej am Neunden Capitel.



Das Euangeliū meyn freunde Christi/wie wir es alle jar haben vnd hörē/also hoffich yhr verstehets auch/vnd wisset was vns daryn wird furgebildet/wolt Gott das dem wissen also nach volget das leben/wie wir denn das mehrer teyl das Euangeliō alleyne hören mit den oren/das wirs wissen vñ nicht das man darnach lebt/so es doch dahin gericht solt werden/das wenig wort aber eytel leben draus wurd/wie sollen wir yhm aber thun/wir können nicht mehr/denn das predigen/nicht weytter heben nach tragen/müssens predigen vnd so lange treyben/bis das Gott auch eyns kom/gebe vns seyn gnad darzu/das der wort wenig werde/vnd das leben furgehe vnd wachs.

Das erste teyl das vns hieryn furgetragen wird ist das Euangeliū/nemlich do er spricht/ Sey getrost meyn son/dyr sind deyne sünde vergeben. Diese wort zeygen an vñ haben kurzlich verfast/was do sey das reych Christi/nemlich ynn welchem diese süsse stym/diese mütterliche vnd vetterliche wort ynnen gehen/dyr sind deyne sünde vergeben/anders mus man das reych Christi nicht ansehen/so fern es verstanden wird/als wie wir gegen Gott sollen leben/wie dem ewer liebe wol weys/das dieses das hochste ist/die gewissen recht können auffrichten/das wir wissen woran wir mit Gott vnd vnserm nechisten synd. Darumb auch müssen wir auff diesen Worten stehen/vnd der spruche gewonen/Son sey getrost dyr sind deyne sünde vergeben/vnd was der gleychen sprich das
Euang

Euangelon vol vol ist/ Daraus denn volget/ das
das reich Christi also gethan sey/ darinnen trost vnd
vergebung der sunden gehet/ nicht alleyn mit denn
worten das mans verkundige/ wie es denn auch soll
seyn/ sonder auch mit der that/ wie wyr hie yn disem
exempel sehen werden/ denn er hat disem francen die
wort nicht alleyn yn die oren gesagt/ sondern auch
yhm seyne sunde vergeben vnd getrost. Dis erkenntnis
gebürt vns Christen zu wissen/ Es ist wol leychtlich
vnd bald geredt vnd gehört/ wenn es aber zum trefft
en kompt/ so ist das liecht bald verloschen/ vnd der
teuffel hat vns bald abgewendet/ wie yhr den sehet/
das sich die schrift gelerten vnter stehen zuortilgen.
Ich habs vormals oft gesagt vnd sag es ymer dar/
das yhr zu sehet vnd recht lernet die art vnd eygens
schafft des reychs Christi/ Denn wyr wissen wie die
vernunft yn allen stücken geneygt ist/ vom glauben
vnd disem erkenntnis auff die werck zufallen. Hie aber
sehet yhr gar keyne werck/ keyn verdinst/ da ist wider
gebot noch gesetz/ ist nichts mehr da denn anbietung
seyner hilffe seyns trosts vnd seyner gnaden/ eytell
freuntlickeyt die dem gichtpruchtigen widder feret.

Serhalben wenn das reich Christi gemehrt soll
werden/ so mus man mit dem gesetz heraus bleyben/
vnd nicht mit wercken vmbgehen/ den es reymet sich
nicht damit/ das ich sage/ gehe heraus/ lauffe hyn
vnd widder/ büsse deyne sunde/ so vnd so mus in das
halten vn machen/ soltu der sunden on werdē/ Sons
dern stracks on alle werck vnd gesetz/ aus lauter gnad
den/ sind dyr deyne sunde verlassen/ darumb so ist dis
aufferhalb dem reych Christi/ die lentt mit gesetz drin
gen/ Aber wyr fassen solchs alleyn mit den oren vnd
auff die zungen/ gehet nicht zu grundt des hertzen/

A iij denn

denn die sünde hanget vns noch allzeyt am hals/die vns hart anklebt. Wie S. Paulus dauon redet zum Romern am 7. ym todt aber werden wyr es erfahren. wie jzt vnser schwermer geister sind/die sich rümen/geben fur/wie sie es wollen besser machen/vnd sind der jzt auch hie hÿren vns zu/halten das/als ob wyr alleyn den glauben vnd die lieb predigen/Ja sagen sie du must bas dran/must noch viel hoher kommen/Wie hoch mus ich denn kommen? du must bilder zu reysen 2c. Dieser dreck kumpt seher yzt an alle ort/do das Euangelion eyn wenig gepflantz ist/des teuſffels vnkraut wird vns auch zukomen/wie ich euch denn offt vermanet habe/Sehet zu das yhr ynn gesundther erkentnis bleybt/bey der reynen lere Christi/es ist bald vmb dis erkentnis/vnd vmb das liecht geschehen.

Also sag ich meyn freundt/vnd wil euch gebetten haben/das yhr ja nicht gros achtet den geyst/der uch yrgent eyn werck fur schlecht/es sey genant wie es wol/wens gleych todten auffwecken were/wilchs sie noch nicht haben gethan/vnd wie das ist/das sie sagen/hats doch Moses gebotten/du musts warlich thun/was seyt yhr fur Christen? Damit aber solt yhr sie eygentlich spüren/welcher geyst von Gott sey oder nicht/Denn wenn du myr eyn werck furgibst/so ist der heylig geyst nicht/wilcher also eynher gehet/das er mit erst die gnad Christi herbringt/vnd nicht zu den wercken furet/Also fleust er/Dyr sind deyne sünde vergeben/bys getrost 2c. treybt nicht mit ersten auff die werck/sondern holet dich mit ersten hynauff zu Gott/durch seyn süsser wort vnd gnad. Alhie zum anfang/zeyget er dyr nyrgent keyn werck/aber nach
mals

mals gegen dem nehisten. Sie aber plazen bald auff
die werck/wollen eyn hoern geyst haben/treyben vnd
dringen am ersten drauff/lassen los eynhergehen den
glawben vnd die liebe/Dieser ist freylich der heylig
geyst nicht/Christus holdt am ersten das gewissen/
wenn das rechtschaffen ist ym glawben gegen Gott/
als denn weyst ers auch auff die werck gegen dem
nehisten/denn glawben aber hebt er erstlich empor/
vnd treybt die werck zurücke/das konnen sie nicht ver
stehen/Ich wolltes yhn alles nach lassen/wenn sie
alleyne keyn klicker an die werck hingen/denn sie yhr
datum/ehr/nott vnd rum dazu setzen/Ich wolltes
auch nicht achten/das sie alle bilder zurissen/kelch
vnd glocken ynn eyn hauffen schmelzten/aber das sie
eyn gewissen wollen machen/denen die nicht bilder
umbreyssen/wer du? gleych ob der heylig geyst nicht
da wer/odder der glawb/es sey denn dis werck dar
bey.

Ich sag das/obs schon eyn werck wer/das Gott
jzt auff diese stund geböt/dannoch wollt ich nicht
also drauff dringen/vnd den jenigen verdammen der
nicht fluck's nach volget/wolt yhm yrgent eynen des
ckel finden/das er vielleycht nach schwach wer/vnd
das gnaden reych also vber yhn sprengen. Wyr wer
dens ynne werden/das das werck ynn ynen gegen
Gott gerichtet ist/vnd nicht hierunder gegen dem
nehisten geet/machen eyn not draus/wenn du das
thust/so bistu eyn Christ/thustu es nicht/so bistu key
ner/wo mans thut/do seyn Christen/Dieser runt
volget dem werck das sie wollen besser gesehen seyn
fur die andern/Yhr aber habt nu das rechte liecht/
darumb auch seyt gewarnt/probiert die geyster/wyr
wollen

wollen vns nicht furgihen wie dieser geyst/sonder
ynn dem woll wyr vns rümen/das wyr das wort hör
ren/Sey getrost dyr sind deyne sunde vergeben/das
ich weys/das ich eyn gnedigen Gott hab/aber das
kan dieser geyst nicht/darumb ist's auch eytel teuff
lich gespenst wor mit sie vmb gehen/sie liegen denn
heyligen geyst an/ynn diesem das sie yhm schuld ges
ben / yhr ding sey vom heyligen geyst. Vnd obs
gleich gutte werck weren /dennoch must das zwin
gen vnd dringen dahynden bleyben/geschweyg den
das sie so tolle werck fargeben.

Das reych Christi gehet also/das wyr all vnsern
rum vnd droz ynn die gnad setzen/die andern werck
sollen frey seyn nicht drauffzwingen vñ da von Chri
sten seyn/sonder mit den wercken hierunder komen/
zu vnserm nehisten. Also solten wyr das Euangelion
hörn/das wyr die spruch fasten/das es yns hertz ges
schryben wurde/das dis liecht diese wort vnd lams
pen recht ynn vns leuchtet/da durch wyr richten
konnen all andere lere/Also sagt er zum gichtpruch
tigen dyr sind deyne sunde vergeben/Diese wort vnd
der gleyche gehörn dahyn das man sie yns hertz fast/
so es doch nichts ist denn alleyn gnad/keyn werck/
damit das gewissen gedrungen wurd etwas zu thun.
Aber mit diesen Worten mustu dich schutzen widder
die falschen propheten/Wyr haben nu das wortt eyn
wenig gepflanzt/das kan der teuffel nicht leyden/
denn er schlefft nicht/die ruppen vnd keffern werden
kommen/vnd werdens beschmeyssen/aber es mus al
so seyn/Christus der wil seyn wortt probiern vnd vers
suchen/wer es gefasset habbe odder nicht/Sarumb
last vns auff der rechten ban zum reych Christi bley
ben

ben/nicht mit wercken/gesetzen treyben odder zwin-
gen vnghehen/alleyn mit dem wort des Euangelij/
die das gewissen getrost machen/Bis frolich sey ges-
trost deyne sunde sind dyr vorgeben. Dar bey merck
nu wie eng vnd wie weyt das reych Christi ist. Wes-
nig ist yhr/die das wort also fassen das es yhn schme-
ckt vnd die sich draus richten können/dyr sind deyne
sunde vergeben/Wenn wyr denn nu ym reich Christi
sind/was gedencft er der sunden? sind den ymmer dar
sunde da? Nyemant gehort ynn das reych/es wer-
den yhm den durch das Euangelion seyne sund geoff-
endt/sonst begegnet keynem diese wort/Alle hörn das
Euangelion/aber es geth yhn nicht allen zu her-
zen/denn sie fñlen nicht all yre sunde/Das Euangeli-
um aber predigt/das alles was an vns ist sunde sey/
Darumb so beuts auch trost an/Sie sunde verge-
bung ist da/sol myr die vergebung widder faren/so
mus da seyn das erkentnis der sunden.

Vergebung der sunden/ sind nicht mehr den zwey
wort/daryn das ganz reich Christi steth/Es müssen
sunde da seyn/wen sie da seyn/so mus man sie erken-
nen/wenn ich sie erkant hab/so ist vergebung vnd
gnad da/ehe den vergebñg da ist/so ist eytel sunde/
das mus bekant seyn/das ichs fñlh vnd weys/das
alles blindheyt sey was an myr ist/sonsten wird die
vergebung der sunden nicht bestehn können/wo nis-
cht sunde ist/aber es mangelt an sunden nicht/son-
der an dem das wyr sie nicht erkennen/Das ander-
teyl ist die vergebung der sunde/Eyn mensch vergibt
also dem andern/das ers morgendt widder gedencft
odder yhm etwan furwirfft/Wen aber Gott die sun-
de vers

de vergibt/das ist viel eyn hoers widder wen eyn
mensch vergibt/ dan er verdammet nicht mer/lest
hie allen zorn farn. Wen den seyn zorn hynweck ist/
so nympt er die hell/teuffell/todt/vnd alles vnglück
hynweck das derteuffel mit sich mag bringen/vnd
an stat des zorns gibt er gnad/trost/heyl vnd alles
gut/das Gott selbs ist.

Sunde ist eytel vnglück/Vergebung eytel glück/
Die maiestet ist gros/gros ist auch das das sie ver-
gibt/wie der man ist/also ist auch die vergebung/
es mus aber ym hertze geschmeckt seyn/wie gros dies
se wortte sind/darauff du dich wyssst zuverlassen/
vnd frölich druber sterben/Aber wenig sind yhr die
es fassen/darumb sind auch wenyg rechter Christen/
Das ist das reych Christi/wer es also hat der hatt es
recht/da ist keyn werck/alleyn das erkentnis alles vn-
sers vnglücks/vnd auffnehmung aller gütter Gottes
Bis frolich/erschrick nicht ynn deynem gewissen
der sunden halben/das du nicht vil gutes gethan
hast/ich will dyr es alles nachlassen/Sarumb so ist
es keyn verdinst/sondern eytel geschenck/das ist das
Euangelium/darauff gehört der glawb/das diese
wort nicht vmbsonst werden gesaget/Denn wyr has-
ben keynen andern trog den darauffer vns heyst stol-
zirn/derhalben bis gutter ding/gehabe dich woll/
den ich vergieb die sunde/auff meyn vergeben do-
rhum dich/da prang auff/da hastu vrsach zu rhus-
men vnd zurangē/nicht auffdeyne werck/Das kon-
nen die werckheylligen nicht lassen/denn allwegen
volget eyn rhum hernach/wie sie gesaget haben/Der-
tugen

tugent volgt ehr nach/ gleych wie der schatwe dem
menschen / Mens eyn rhum ist von vnsern wer-
cken/es habens menschen odder Gott gebotten/so
ists dreck/ Mens eyn rhum ist von den wercken/die
Gott ynn vns thut/so ists recht/wie der hundert
vnd .is. psalm sagt/ Die rechte des herren ist erhö-
het/ Die rechte des herren beweyset stercke/ als solt
er sagen / darumb wyll ich rhumen vnd bochen das
er mich erhoben hat aus todt/hell vnd allem vns
gluck/ Sisen rhum können sie nicht haben/wie sie
auch das wort nicht haben/ Sonder wie das werck
ist/also ist auch der rhum/treyben vnd zwingen vom
wort anff die werck/ Der heylig geyst treybet von
wercken auff's wort/diese prangen auff ire werck/
Jene da der heylig geyst ist prangen ynwendig ynn
hertzen auff Gott/das er dis werck gethan hatt/
bleyben an dergnaden hangen.

Also thun hie dye Schriftgelerten/do sie das
hortten/sageten sie/ Siser lestert Gott etc denn diese
art hatt das heylig Euangelion vnd recht wort
Gottes/wo es recht geglawbt wirt/das es auff bes-
der seyten gelestert wyrd/vnd die ganze welt wils
vertilgen/woye zu der Apostel zeyten geschach/vnd
wie auch yzandt vnser dölle fursten wollens todt
haben/gantz dempfen vnd vertilgen/mit allen die es
predigen vnd bekennen.

Die ander veruolung ist noch vil erger/die vns
der vns entsteht/woye auch zu der Aposteln zeyt vns
der dē Aposteln/ also auch yzt vnser iücker/die das
Euangelio mit vns habē/wollē nicht pebstisch seyn/
B ij sonder

sonder für Christen gehalten/die müssen hierenher
plagen/so doll sind sie/das sie sich des Euangelium
räumen/vñ doch auff die werck gehn/vnd hie mus der
heylige geyst der teuffel heysen/dort der schon geyst.
Aber wyr mussens wagen/wyr werden müssen sagen
yhr dinck sey nicht recht/so werden sie widder vmb sa
gen/onser dinck sey nicht recht/denn der böß geyst ru
get nicht/er hab denn eyn rhum/wyr aber haben ey
nen schuzhern der wyrd es wol hynaus furen.

Paulus der heyst all falsche geyster kün vñ hoffer
tig/ia auff yhr mysten/bey yhren yahren do sind sie
stolz vnd frech/sonst sind es die verzagten bößwicht
er die man finden soll/Ja wenn sie sollen antworten
vnd stehn/so kan sie keyner herzubringē/wollen euch
ym fleysch beschneyden lassen/bey yhn sind sie kün/
dorffen Gott yns maul greysen/aber wenn sie es an
greysen sollen/verzagt/Der heylig geyst aber der
spricht/Son dyr synd deyne sinde verziehen.

Der rechte geyst ist blöd vnd macht sich blöde
gegē Gott/also die Christen bücken sich gegen Got/
vnd halten yhn ynn ehren/nicht stolz/Aber widder
die tyrannen do blest ynen der heylige geyst den
mutt also auff/das sie widder tyrannen noch teuffel
furchten/sind vnerschrocken/solt man yhn auch den
hals druber weg reyssen/gegen Gott aber do furchs
ten sie sich wie eyn rauschen bladt/Darumb sagt er/
Sey getrost/hye furcht dich/das sparn sie aber gegē
den menschen/Es ist myr alleyn darumb zuthun/
das wyr ymmer hyn horn/vnd fassen der spruch nis
cht/das/wenn es eyns zurantwort kompt/werden
wyr

wyr stehn wye dy pfeyffer / so gen wyr dahyn an den galgen / Aber wyr müssen es leyden / ydoch des mögen wyr vns wol trosten / das wyr ia den grundt haben / das vnser ding recht ist / vnd yhres vnrecht / der halben können sie niemmer keck seyn / denn alleyn bey denn yhren do rhümen sie sich.

Da durch aber bestehet vnd wyrd das reych Christi gemerht / das das gewissen mit dem wort getröst werd / was sonsten mit wercken vñ gesezen geschicht gehort alles rauser zu dem nehisten / wen der werck gegen Gott darff ich gar nicht / sondern alleyn die sünde woll erkennen / vnd Gottes vergebung / als denn byn ich mit Gott eyns / welches der heylig geyst thun wyrd / darnach so brich ich heraus wye diese hie thun / die den gichtpruchtigen zu dem Herrn getraggen brachten / Diese waren ym reych / odder bezeygē ia die ienigen die ym reych sind / darumb das er sagt / Er hab yhren glawben angesehen zc wo sie den glawben nicht gehabt hetten / so hetten sie yhn nicht zu ym bracht / Der glawb ist vor dem werck / das werck nach dem glawben / Derhalben dyerweyl sie yzt ym reych sind / pringen sie das werck / Auff dieser erden lebt der mensch nicht des wercks halben / bedarff seyn auch nicht / richstu aber eyn werck an / so ist's aus.

Aber die weyl du glawbest vnd lenger lebest / so mustu wissen das du darumb lebst / das du den gichtpruchtigen herzu bringen solt / Gott wil eynen Christen nicht vmb seynt willen lassen leben / ya verflucht sey das leben das fur sich lebt / wenn alles das hynasch gelebt wyrd / lebt man vmb der andern willen / Also thun auch diese die den Francken herzu bringen / Dieser Franck hat erstlich keynen glawben / aber herna

B iij chmals

chmals hört er das wort/vñ Christus geußt yhm den
glawben eyn/erweckt yhm mit dem Euangelio/wie
er denn pflegt den glawben mit dem wort eynzugie
ssen/ Also sollen alle werck gethan seyn/das wyr ala
leyn sehen ob sich die werck dahyn reymen das sie an
dern leutten eynen gutten glawben bringen vnd furen
zu Christo/ Wenn ich darumb eyn bildt vmbreys/
das man sehe das da eyn Christen sey/da ist nicht ge
prediget wie man der sunden los werde/sonder ala
leyn gerhünt wollen seyn/welcher rhum richt die ges
wissen nicht auff/sperrren alleyn den leutten damit
orn nasen vnd augen auff/Ist eyn schlechte kunst bila
der sturmen/das du aber das reych Christi also erken
nest/das myr odder diesem geholffen werd/das wyr
stu nicht ausrichten/wen du auch all kyrchen eynrist
sonder damit das du dis wort hörest/Alleyn son dye
sind deyne sunde vergeben.

Das wort mus man treyben/mus geplent seyn vn
ter den menschē/da mus ich essen vnd drynckē/mich
zyren vnd kleyden/nicht das ich lebe/sonder das ich
das wort treyb/das wo eynes Christen leben nicht do
hyn gerycht ist auff das wort/so ist es nicht recht/dē
gewissen mus ich helffen nach dem wort/den nehiste
speysen vñ trencken/vñ yhm alles thun was ich kan/
auff das ich zum haubtstück kom/das gewissen auff
zurychten/woye diese hye thun/helffen yhm zu seynem
leyb vnd gesuntheyt/vnd obs wol eyn leybliche wola
that odder werck ist/Idoch so helffen sie yhm dahyn
das seyn sele widder auffgericht wyrd/Also speys ich
eyn hungerichen/trenck eyn durstigen/kleydt eyn nas
ckeden/vnd des gleychen/aber nicht alleyn das er
efs od

ess odder drinck / sonder das ich mit diesen wercken
mit yhm zuschaffen gewin / vñ yhn zu Christo bringē
mög / Diese werck sind aufferhalb dem reych zu denen
die nicht ym reych sind / auff das du sie auch zu dem
reych bringest / Al so prediget der heylige geyst / vnd
ist genug miracels das die leudt Christum erkennen /
vñ eyn frolich gewissen kriegen / Das ich gelernt hab
das Moncherey vnd was der Papisterey mehr ist / nie
chts sey / ist vor myr eyn gros mirakel / Ist nichts das
sie vns schuldt geben myr thun keyn mirakel / ob sie
wol nicht so hell scheynen vnd vnser prediger keyn zey
chen thun / ydoch so ist das liecht vñ erkentnis recht /
sie predigen ya das Euangelium . Also habt yhr hie
das reych Christi vnd das Euangelium / das du all
deyn leben / du seyst weyb kind odder man / da hyn ris
chtest / das du der seyst / auff das du den krancken her
zu bringest / das ist vnser wesen.

Vom frembden glawben.

Vu solt wyr auch vom frembden glawben vnd
von der gewalt sunde zuuergebē eyn wenig handeln.
Ich habs vorhyn auch gesagt / das es eyn yrtumb
sey / das man die kindlin yn dem glawbē der kyrchen
tauffen sol / vñ haben geprediget gleych sam werden
sie one glawbē getaufft / Dieser yrtumb geth yzt mit
gewalt hyreyn / den der teuffel schlefft nicht / sie meys
nen das keyn glawbe da sey / Der Babst mit den seys
nen hats bisher also gehalten / das die kinder keyn
nen glawben haben / sonder werden ynn die schos der
Christlichen kyrchen gelegt / vnd man hatt sie ynn
der Christenheyt glawben getaufft / Diese newe sas
gen

gen auch das die kinder keynen glawben haben/wie
der Babst/ sondern das man harren sol/bis sie gros
werden 2c. Wyr sagen also/das der frombde glawb
nicht helff/wenn auch zwo Christenheyt do stunden/
dis kind ist fur mich nicht geboren/wyrd auch nicht
fur mich sterben/hatt eyn eygen todt vnd geburt/sol
ich denn leben vnd vom todt loss werden/so mus ich
auch durch den glawben yn Christum heym komē/
Wyr bitten aber fur die kinder/wie auch fur alle vn-
glawbigen vñ predigen bettē vnd dohyn erbeytē/das
die unglawbigen auch her zukommen/darumb leben
wyr auch. Also haben diese den glawben gehabt/nis-
cht der gychspruchige/ er must yhn aber bekommen/
sonst het yhm yhr glawbe nichts geholffen/Aber sie
yn yrem glawben badten Christum/dem vmb eynen
eygen glawben/Also hylffte der frembde glawbe/das
ich yhn auch krieg/Wyr wissen nicht welcher glaw-
be odder nicht/wenn ich gleych alt kom zur tauff/
vnd sprich/ich glawb/wie kanstu wissen ob ich
glawb odder nicht/wie weystus: wie wenn ich lög:
es kans keyner wissen/da bringt yhn her seyn eygen
wort vnd gedanken/ists recht so ist recht/Das
kindt mus nicht auff meynem glawben stehn/ich hab
fur mich selbs kaum glawbens genug/ich sol auch
nicht alleyn yn die schos der Christenheyt legen/son-
der yn das wort Gottes/do er spricht/ Last die kind-
lin zu myr komen/denn das hymelreych ist yhr/Hie
bring ich dyr Christe eyn kindlin/das hastu mich zu
dyr heysen tragen/hie hab ich meyn werck gethan/
Christus der wyrd auch das seyne thun/Also tauff
ich das kind nicht yn meynem oder der Christenheyt
glawben/sonder meyn glawbe vnd der Christenheyt
brins

bringt das kindt herzu/darumb/das er ym geb eyne
eygen glawben/vnd glawb wie ich glawb/vnd ynn
dem wort das myr Christus gebē hat/nicht tauff ich
darauff/das es kein glawbē hab/wie die Behem mey
nen/das/wen es gros werdt/sals yhn krigen/spreche
en vbers kindt das wort Gottes/dyr sollen deyne sun
de vergebē seyn/vnd es sal doch die wortt nicht glaw
ben/heyst das nicht Gottes wort gelügen strafft:
Ich kan woll eynem andern durch meyn gebett vnd
glawben helffen das er auch glawbt.

Von der gewalt auff erden sunde zuvergeben.



Die Phariseeer wustent das
Gottes werck war/das alleyn Gott
zustundt/sunde zuvergeben/der hals
ben hiltent sie Christum fur eyn Gots
teslesterer/welcher als eyn mensch
wolt sunde vergeben. Zweyerley weis
werden die sunde vergeben/Erstlich
die sunde auß dem hertzen treyben vnd gnad eyngyff
en/das Gott alleyn thut/zum andern/verkundig
gen vergebung der sunde/Aber Christus thuts hie
beydes/Ins hertz gibt er yhm den geyst/auswendig
verkündigt ers yhm mit dem wort/das ist mit dem
wort vergeben/vnd ist eyn verkundung vnd offentli
che predigt von der ymerlichen vergebung/Diese ge
walt haben alle menschen/denn daraus preysen sie
Christum/welche Christen seyn/vnd getaufft/haben
das wort ym munde/sunde zuvergeben/das sie sa
gen/

gen/Sich mensch Gott beut dyr seyne gnade an/
schenckt dyr alle deyne sunde 2c/ Dife stym sol nicht
auffhoren bis auff den Jungsten tag/ Dyr sind deyn
sunde vergeben/bis frolich vnd getrost 2c Dis wort
hatt eyn Christ ym mundt/vnd furt das wort ym
welchem die sunde werden vergeben/ Also hat eyn
Christ gewalt vñ vergebung der sunden/ Ser halben
wen ich zu dyr sage/ Dyr sind deyn sunde vergeben/
wer wolt das thun/wen Christus selbs nicht herab
gestigen wer/vnd het myrs ym mundt gelegt vnd ge
saget/Das thut ym meynem namen/das schneydt/
das thuts/ Wen keyn mensch auff erden were/der
sunde vergeben/werden alleyn gesetz vnd werck/ O wol
eyn blödt vñ elendt dincß wer se mit den gewyssen/
Nu aber so Gott eynem yzlichen den müdt vol gibt/
dyr sollen deyne sunde vergeben seyn 2c du seyst wo du
seyst/so ist das gulden iar angagen/Sarauff sollen
wyr trozen/das dyr deyne sunde vergeben werden/
mag ich sprechen vnd thun/wie wol ich dyr den heys
ligen geyst vnd glawben nicht kan geben/dennoch
kan ich dyrs verkundigen/glawbstus/so hastus auch
welchen es denn schmeckt/die loben vnd preysen
Gott wye sie auch hye thun/ Das heyst/Gott
hatt allen gewalt gegeben sunde zuerge
ben/vnd das ist das reych Christi
mehren/das gewissen holen
vnd auffrichten/das
thun myr durc
chs wort.



4
1/2


4063 R

(X2270053)



40





inches

1

2

3

4

5

6

7

8

9

10

11

12

13

14

15

16

17

18

19

6

7

8

9

10

11

Centimetres

Farbkarte #13

B.I.G.

Blue

Cyan

Green

Yellow

Red

Magenta

White

3/Color

Black

